

REPubliKA E KOSOVËS / REPUBLIKA KOSOVO / REPUBLIC OF KOSOVO
ZYRA E PRESIDENTIT - URËD PREDSEDNIKA - OFFICE OF THE PRESIDENT

Nr. Prot.:
Br. Prot.:
Prot. No:

943

Date:
Datum:
Data:

07, 08, 2018

PRISHTINË/A



REPUBLIKA E KOSOVËS – ZYRA E PRESIDENTIT
REPUBLIC OF KOSOVO – OFFICE OF THE PRESIDENT
REPUBLIKA KOSOVO – KANCELARIJA PREDSEDNIKA

KËSHILLI KONSULTATIV PËR KOMUNITETE
CONSULTATIVE COUNCIL FOR COMMUNITIES
KONSULTATIVNO VEĆE ZA ZAJEDNICE

KODI I MIRËSJELLJES PËR ORGANIZATAT
PËRFAQËSUESE TË KOMUNITETEVE

Prishtinë, 02.08.2018



REPUBLIKA E KOSOVËS – ZYRA E PRESIDENTIT
REPUBLIC OF KOSOVO – OFFICE OF THE PRESIDENT
REPUBLIKA KOSOVO – KANCELARIJA PREDSEDNIKA

KËSHILLI KONSULTATIV PËR KOMUNITETE
CONSULTATIVE COUNCIL FOR COMMUNITIES
KONSULTATIVNO VEĆE ZA ZAJEDNICE

Këshilli Konsultativ për Komunitete,

Në mbështetje të neneve 5 (3) dhe 12 (1) pika (b) të Ligjit Nr. 03/L-047 për Mbrojtjen dhe Promovimin e të Drejtave të Komuniteteve dhe Pjesëtarëve të Tyre në Republikën e Kosovës (GZ, Nr. 28, 4 qershor 2008), si dhe nenit 43 të Statutit të Këshillit Konsultativ për Komunitete (miratuar me dekretin e Presidentit Nr. DNJ-02-2017, datë 6.12.2017), në takimin e mbajtur më 02.08.2018, miraton:

**KODIN E MIRËSJELLJES PËR ORGANIZATAT PËRFAQËSUESE TË
KOMUNITETEVE**

KAPITULLI I – DISPOZITAT E PËRGJITHSHME

Neni 1
Qëllimi

Ky Kod i Mirësjelljes ka për qëllim rregullimin e çështjes së përfaqësimit autentik të komunitetit përkatës, funksionimin demokratik, efikasitetin dhe transparencën financiare për Organizatat Përfaqësuese të Komuniteteve.

Neni 2
Fushëveprimi

Ky Kod i Mirësjelljes zbatohet nga Organizatat Përfaqësuese të Komuniteteve.

Neni 3
Përkufizimet

1. Shprehjet e përdorura në këtë Kod kanë këtë kuptim:

- 1.1 **Këshill** – Këshilli Konsultativ për Komunitete;
 - 1.2 **Sekretariat** – Sekretariati i Këshillit Konsultativ për Komunitete;
 - 1.3 **Organizatë Përfaqësuese e Komunitetit** – nënkupton çdo organizatë joqeveritare, e cila është e themeluar dhe e regjistruar në përputhje me ligjin përkatës, dhe e cila deklaron se përfaqëson një komunitet të caktuar;
 - 1.4 **Statut** – Statuti i Këshillit Konsultativ për Komunitete;
 - 1.5 **Ligj** – nënkupton Ligjin nr. 03/L-047 për Mbrojtjen dhe Promovimin e të Drejtave të Komuniteteve dhe Pjesëtarëve të Tyre në Republikën e Kosovës (GZ, Nr. 28, 04 qershor 2008), i ndryshuar dhe plotësuar me: nenin 15 të Ligjit nr. 04/L-115 (GZ, Nr. 25, 7 shtator 2012) dhe Ligjin nr. 04/L-020 (GZ, Nr. 29, 27 dhjetor 2011);
2. Shprehjet e tjera të përdorura në këtë Kod kanë kuptimin e njëjtë si në përkufizimet e Statutit dhe Ligjit.

Neni 4 **Parimet e Përgjithshme**

1. Organizatat Përfaqësuese të Komuniteteve zhvillojnë aktivitetet dhe veprimtarinë e tyre në pajtim me këto parime:
 - 1.1. **Parimi i Ligjshmërisë** – Organizatat Përfaqësuese të Komuniteteve ushtrojnë veprimtarinë e tyre në pajtim me Kushtetutën, instrumentet e aplikueshme ndërkombëtare në Kosovë dhe legjislacionin në fuqi;
 - 1.2. **Parimi i Pavarësisë** – Organizatat Përfaqësuese të Komuniteteve janë të pavarura në implementimin e programeve dhe të projekteve, zhvillimin e aktiviteteve në realizimin e qëllimeve të tyre, si dhe marrjen e vendimeve përmes vendosjes së procedurave të punës, të cilat pengojnë sjelljen e vendimeve të ndikuara nga cilido individ, organizatë, institucion apo parti politike;
 - 1.3. **Parimi i Mosdiskriminimit** - Organizatat Përfaqësuese të Komuniteteve, në Këshill dhe jashtë tij, gjatë ushtrimit të funksioneve dhe zhvillimit të aktiviteteve të tyre, nuk lejojnë kurrfarë diskriminimi të drejtpërdrejtë apo të tërthortë në bazë të racës, ngjyrës, gjinisë, gjuhës, fesë, mendimeve politike ose të tjera, prejardhjes kombëtare e shoqërore, lidhjes me ndonjë komunitet.

KAPITULLI II – RREGULLAT E MIRËSJELLËJES PËR ORGANIZATAT PËRFAQËSUESE TË KOMUNITETEVE

Neni 5 **Mirësjellja e Organizatave Përfaqësuese të Komuniteteve**

Organizata Përfaqësuese e Komunitetit, në Këshill dhe jashtë tij, do të punojë dhe veprojë në të mirë të bashkëpunimit ndërmjet komuniteteve dhe kundër nxitjes apo përhapjes së urrejtjes ose jotolerancës racore, etnike apo fetare apo çfarëdo dallimi tjetër.

Neni 6

Përfaqësimi autentik i komunitetit përkatës

Organizata Përfaqësuese e Komunitetit, në procesin e mbrojtjes së të drejtave dhe promovimit të interesave të Komunitetit, gjatë ushtrimit të funksioneve, zhvillimit të aktiviteteve dhe implementimit të projekteve, do të përfaqësojë në mënyrë autentike komunitetin përkatës dhe do të veprojë me ndershmëri, paanshmëri, integritet dhe transparencë në të gjitha marrëdhëniet dhe lidhjet si përfaqësuese e komunitetit përkatës në Këshill.

Neni 7

Funksionimi demokratik

1. Organizata Përfaqësuese e Komunitetit, në përputhje me Statutin e saj dhe legjislacionin përkatës në fuqi, ndërton strukturën udhëheqëse të saj me të cilën siguron funksionin demokratik të saj.
2. Kjo strukturë udhëheqëse siguron:
 - 2.1 që anëtarët në strukturën udhëheqëse, dhe anëtarët e tjerë, kanë aftësinë dhe përvojën e kërkuar për të përmbushur detyrat e tyre, duke vepruar në të mirë të organizatës dhe qëllimit të saj;
 - 2.2 përzgjedhjen e personave kompetentë, të përgjegjshëm dhe të pavarur, për anëtarë në organet drejtuese dhe mbikëqyrëse;
 - 2.3 respektimin dhe trajtimin e barabartë për të gjithë anëtarët pa dallim;
 - 2.4 ngritjen e kapaciteteve të të punësuarve dhe vullnetarëve, përmes promovimit dhe motivimit përkatës për angazhimet dhe rezultatet e tyre;
 - 2.5 paanshmëri në politikat dhe praktikën e saj të marrjes në punë dhe të promovimit për të gjithë pozitat udhëheqëse, stafit, anëtarëve dhe vullnetarëve;
 - 2.6 që politikat janë të shkruara qartazi, të miratuara sipas procedurave përkatëse, ndërsa dokumentet e brendshme, rregullat dhe procedurat e veprimit vendosen në pajtueshmëri me Statutin e organizatës dhe legjislacionin përkatës në fuqi.

Neni 8

Bashkëpunimi

1. Bashkëpunimi i Organizatave Përfaqësuese të Komuniteteve udhëhiqet mbi bazën e parimeve të respektit të ndërsjellë, bashkëpunimit, tolerancës dhe mirëkuptimit.
2. Organizatat Përfaqësuese të Komuniteteve janë të dedikuara dhe në mënyrë unike përkujdesen për mbrojtjen dhe promovimin e të drejtave të komuniteteve.

3. Organizatat Përfaqësuese të Komuniteteve kujdes të veçantë i kushtojnë komunikimit dhe bashkëpunimit me organizatat e shoqërisë civile që merren me mbrojtjen dhe promovimin e të drejtave të komuniteteve, të cilave u ofrojnë përkrahje aktive ndaj iniciativave të tyre.

KAPITULLI III – DISPOZITAT PËRFUNDIMTARE

Neni 9 Zbatimi i Kodit

Të gjitha Organizatat Përfaqësuese të Komuniteteve pjesëmarrëse në procesin e nominimit për anëtarë të Këshillit e zbatojnë këtë Kod.

Neni 10 Përkthimi i Kodit

Sekretariati i Këshillit përkujdeset që ky Kod të përkthehet në të gjitha gjuhët e anëtarëve të Këshillit.

Neni 11 Shfuqizimi

Me hyrjen në fuqi të këtij Kodi, shfuqizohet Kodi i Mirësjelljes për Organizatat e Akredituara Përfaqësuese të Komuniteteve (20.06.2013).

Neni 12 Hyrja në fuqi

Ky Kod hyn në fuqi shtatë (7) ditë pas miratimit nga Këshilli.


Gazmen SALIJEVIĆ
Kryesues i Këshillit Konsultativ për Komunitete

Prishtinë, 02.08.2018